

Mei Vadde – Hosse Pitter – on die besoffene Jääs en Owwebreisech

Robert Hoß

Während on no em Kreech, bis Anfangs de fuffzejer Johre - mir hann dumols noch en de Hindenburchstroß (heut Manusjass) en Owwebreisech jewonnt, hatten mein Ellere en dem kläne Höffje e paar Höhner, Knein em Kneinsstall on et wuer och noch en Sau em Säustall jezohre. Em Jaate op de Wölljass, bo mir dann Anfangs de siebzejer Johre neu jebaut hann, jof et Krompere, Jemös, Schloot, Bunne, Pittesillech, Sellerie on Brätlooch, also all dat, bat suen 4-Persone-Haushalt zum Sellefsversorje bruch.

Sujar en kläne Streife am Pädche entlang hat de Mamm für Bloome reserviert.

Änes Daachs hätt mei Vadder, de Hosse Pitter, ohs dann domet üwwerasch, dat er och noch en Jääs jekoof hat, die sollt groß jezohre were on köhm dann, wenn die Sau jeschlaach were sollt, met en de Wuesch. Weil für die Jääs awwer beim beste Welle en dem kläne Höffje on och en dem Säustall kä Platz mi woer, hätte mem Maurebrechers Will op de Lehsbaach ausjemaach, dat die Jääs bei dem en en freie Stall kohm. Jefödert wur die von ohs on och et Meste mooten mir sellewe maache. Der Will staltt nur den Stall zur Verfüjung.

Bie et dann op dat Schlaachte anjing, hätt sech de „Schwaaze Juan“, der die Hausschlachtunge em Dorref mooch, die Sau on och die Jääs vürher anjesehn on dobei fassjestallt, dat dat ja kän richteje Jääs on och käne richteje Jääs-sebock sondern en Zwitter wor, bat se meinem Vadder do anjedreht hatten. Op Owwebreiseje Platt wor dat Dier en „Bennebier“ on no em Juan on der alljemeine Mähnung em Dorf woer dat Flösch für en de Wuesch net ze jebrauche, weil me datt schmecke deht on er hätt meinem Vadder jerode, dat Dier no em Schlaachde op de „Schenskaul“ ze bringe, bo zu der Zeit all dat kranke Veh begrawwe wuer.

Dat woer natürlech en Schlach für meine Vadder: Die ganze Arbet sollt ömsoss jewäeß sein; dat ganze Jahr üwwer ömsoss jefödert on die Stallarbet jemaach, dat konnt doch net sein. Er hätt sech dann üwweball ömjehürt on dann von e ahl Baueschfroh erfahre, die änzeje Möchlechkät wär, die Jääs für em Schlaachte besoff ze maache, dann wär der Jeschmack neutralisiert on dat Flösch von der Jääs ze jebrauche.

Dat woer natürlech e Woert. Mei Vadder on meine Broder sein dann en hallef Stonn ih die Jääs jeschlaach were sollt en de Stall beim Maurebrechers Will on hann den jode Rot en de Tat omjesatz: Mei Vatter hätt der Jääs dat Maul opjeress on meine Brode Martin hät dann en schwatz jebannte Flasch „Knolli-Brandi“ erennjeschütt, die Jääs moot nur noch schlucke, jet annesch bliff ihr net mie üwwerech! Op de Stell woer dat Dier total besoff, deht die Ohre verdrehe on staltt die Bähn en all vier Himmelsrichtungunge on konnt käne Schrett mi john.

Datt hat meine Vadder natürlech net bedaach, vom Will seinem Stall bis bei ohs en de Hoff woret jo noch e jot Stöck on et bliff im jetz nix annesch üwwerech, jetz mote die Jääs mie oder winnijer och noch zum Schlaachte drohn! En de ZwöschENZEIT hatt de Schwaaze Juan die Sau att jeschlaach, die hing at an de Läter. Su bliff für ihn on für ohs noch Zeit, sech dat Schauspill anzesehn, bi die zwä, meine Vadder on meine Broder met der Jääs anjeschläf kohmen, all Beteilechde woren fix on ferdech! Bie die Jääs dann endlech em Hoff woer, wor der Ress für de Juan dann e Kennespill.

Der Rot von der ahl Baueschfroh awwer wower Jold (Wuesch) Wert on sellefs de Juan anschließend jesoet: „Pitter, dat es de beste Wuesch, die ech jemols jemaach hann!“